

UMP jalin kerjasama dengan LLM dalam pendidikan dan penyelidikan lebuhraya



Kuala Lumpur, 8 Mac- Universiti Malaysia Pahang (UMP) jalin kerjasama dengan Lembaga Lebuhraya Malaysia (LLM) sebagai rakan strategik terbaharu dalam usaha memberikan nilai tambah dalam Pendidikan dan Penyelidikan khususnya terhadap bidang kejuruteraan lebuhraya, pengendalian trafik dan pengurusan infrastruktur yang dapat memanfaatkan pengguna lebuhraya di negara ini.

Dengan kerjasama ini peluang seperti peningkatan teknologi, pembangunan modalinsan, perkongsian pengetahuan serta penyelidikan, pembangunan dan pengkomersilan telah tersedia untuk diteroka oleh kedua-dua belah pihak bagi merangsang produktiviti, inovasi dan pertumbuhan ekonomi terutamanya dalam bidang berkaitan pengurusan lebuhraya.

Majlis menyaksikan Naib Canselor UMP, Profesor Dato' Sri ts. Dr. Daing Nasir Ibrahim menandatangani dokumen memorandum persefahaman (MoU) bersama Ketua Pengarah LLM, Datuk Ir Haji Ismail Md. Salleh di LLM Kuala Lumpur. Hadir sama Timbalan Ketua Pengarah (Bisnes) LLM, Dato' Sr. Aziz Abdullah LLM.

"UMP komited untuk bersinergi dengan LLM bagi melaksanakan kerja-kerja perundingan, penyelidikan, pembangunan dan komersialisasi dalam projek-projek bersama yang telah dan akan dikenalpasti. Melalui kerjasama ini juga, UMP dalam jangka masa panjang berupaya menyumbang kepada kemajuan industri lebuhraya di negara ini dengan membangunkan bakat-bakat profesional dan teknokrat yang memenuhi keperluan industri tersebut," katanya.



Selain itu ujarnya, UMP menyambut baik cadangan untuk mengadakan program latihan bersama dengan LLM bagi mahasiswa Universiti ini di peringkat prasiswazah dan pascasiswazah, bukan sahaja dari Fakulti Kejuruteraan Awam & Sumber Alam, tetapi juga fakulti-fakulti lain yang berkaitan.

Pada masa yang sama, pihak pengurusan turut bersedia membuka ruang yang seluas-luasnya kepada tenaga akademik dari disiplin-disiplin ilmu yang berkaitan untuk terlibat langsung dalam program-program latihan bagi memperkaya pengalaman teknikal serta meningkatkan kepakaran mereka dalam bidang-bidang tersebut.

Bagi Datuk Ir Haji Ismail, LLM sebagai pengendali lebuhraya pihaknya berhasrat menggunakan kepakaran teknologi dan kejuruteraan berkaitan isu penyelidikan dan menggunakan kreativiti terutamanya berhubung dengan penggunaan teknologi untuk kemudahan pengguna lebuhraya. Beliau yakin hasil gabungan dengan universiti yang mempunyai kepakaran ini pastinya lebih banyak inovasi dapat dihasilkan terutamanya dalam mengurangkan kos projek dan mengoptimumkan kemudahan buat pengguna lebuhraya.

Dalam pada itu delegasi UMP turut berpeluang menyaksikan pengendalian operasi di Pusat Pengurusan Trafik (TMC). Hadir sama dalam lawatan Timbalan Naib Canselor (Penyelidikan dan Inovasi), Prof Dato' Dr. Mashitah Mohd Yusoff, Timbalan Naib Canselor (Akademik dan Antarabangsa), Prof Dato' ts. Dr. Rosli Mohd Yunus dan Timbalan Naib Canselor (Hal Ehwal Pelajar dan Alumni), Prof Dato' Dr. Yuserrie Zainuddin.